

四庫全書

經部

欽定四庫全書

經部

儀禮集編卷三十四

詳校官監察御史臣周元良

給事中臣溫帶綬覆勘

總校官進士臣楊懋珩

校對官編修臣于鼎

謄錄監生臣竇廷棟

欽定四庫全書

儀禮集編卷三十四

龍里縣知縣盛世佐撰

特牲饋食禮第十五之一

鄭目錄云特牲饋食之禮謂諸侯之士祭祖禰非天子之士而於五禮屬吉禮

疏曰曲禮云大夫以索牛士以羊豕彼天子大夫士此儀禮特牲少牢故知是諸侯大夫士也且經直云

適其皇祖某子不云考鄭云祖禰者祭法云適士二廟官師一廟官師謂中下之士祖禰共廟亦兼祭祖故經舉祖兼有禰者鄭達經意祖禰俱言也若祭無問一廟二廟皆先祭祖後祭禰是以文二年左傳云文武不先不窳子不先父是也若祭無問尊卑廟數多少皆同日而祭畢以此及少牢惟筮一日明不別日祭也

敖氏曰此篇言士祭其祖之禮特牲謂豕也士祭用

三鼎乃以特牲名之者主於牲也少牢放此

郝氏曰特牲饋食禮士祭祖禰也特牲一牲卑者先
飯曰饋食尊者先灌曰祭祀曲禮曰大夫以索牛士
以羊豕雜記云上大夫卒哭成祔皆大牢然則大夫
亦時用大牢士亦時用少牢也士喪禮少牢遣奠則
大夫豈無用特牲時邪鄭謂曲禮所言天子之士是
書為諸侯之大夫士何據而別夫禮有隆殺牲有大
小通上下貴賤用之天子郊天亦特牲也謂大夫之

祭隆于士則可謂大夫專用少牢士專用特牲不盡然蓋士虞後繼以特牲者自凶趨吉也特牲後繼以少牢者自殺趨隆也皆記禮之序故是篇首云冠端玄與兄弟之服辭曰諏事適皇祖不言配皆繼前篇虞後祥禫等吉祭言否則何為反以士先大夫邪

張氏曰註疏本不詳他書目次吳氏補之云大戴第七小戴第十三別錄第十五

姜氏曰周禮吉禮十有二皆王禮而若特牲饋食及

下少牢饋食則其下達於士大夫之二禮也凡吉禮
享鬼祀神祭示之屬蓋不勝詳此二禮僅存他皆不
可考矣饋食禮蓋喪禮祥禫以後自凶即吉之祭禮
故為吉禮首也又曰喪畢將祫於祖二廟以上祖禰
各有廟而官師一廟但有禰廟故祖禰共廟

世佐案是經凡言大夫士皆指任於諸侯者言鄭
註得之郝說非說者見此篇繼士虞禮後少牢饋
食之前遂目為自凶即吉之祭尤誤也諸篇次第

皆出於漢儒所定未必合作經者之舊况高堂生所傳本以士禮為名則其以士先大夫也固宜豈得據是而決其為詳禫等吉祭哉

特牲饋食之禮不諏日

註曰祭祀自熟始曰饋食饋食者食道也諏謀也士賤職褻時至事暇可以祭則筮其日矣不如少牢大夫先與有司於廟門諏丁巳之日

疏曰鄭云時至事暇可以祭者若祭時至有事不得

暇則不可以私廢公故也若大夫已上尊時至惟有
喪故不祭自餘吉事皆不廢祭若有公事及病使人

攝祭

教氏曰諏日謂諏其筮日之日也大夫將祭而筮有
諏日之禮此云不諏日則是祭禮之序先尊後卑亦
可見矣不諏日則所筮之日亦在旬之內矣所以下
大夫少牢禮諏日用丁巳筮旬有一日

張氏曰祭祀自熟始曰饋食者初祭即薦飪熟之牲

體及黍稷是用生人食道以事其親若天子諸侯之祭先有灌鬯朝踐饋獻之事至迎尸後乃進熟體黍稷也不諏日者不預諏前月下甸之丁巳以筮來月上甸之丁巳但可以筮則筮而已自此以下筮日筮尸宿尸宿賓視濯與牲凡五節皆祭前戒備之事及筮日主人冠端玄即位于門外西面

註曰冠端玄玄冠玄端下言玄者玄冠有不玄端者門謂廟門

疏曰云冠端玄謂玄冠玄端也下言玄者玄冠有不
玄端者不玄端則朝服下記云助祭者朝服謂緇布
衣而素裳然則玄端一冠冠兩服也云門謂廟門見
士冠禮

敖氏曰筮日筮之日也士筮當朝服今乃玄端者不
可踰其祭服也筮與祭皆與神交故主人之服不宜
有異

子姓兄弟如主人之服立於主人之南西面北上

註曰所祭者之子孫言子姓者子之所生小宗祭而兄弟皆來與焉宗子祭則族人皆侍

疏曰鄭註喪大記云姓之言生也云子之所生則孫是也小宗謂繼禰者五世則遷宗子謂繼別為大宗者若據小宗有服者若據大宗兼有絕服者也

敖氏曰是時子姓而下之服亦玄端統于主人也

世佐案子姓猶言子孫也變孫言姓者子孫止於二世言子所生則曾玄而下皆該之矣先子姓而

後兄弟者子姓據所祭者而言兄弟據主祭者而言也凡同姓者曰兄弟不必與主人同昭穆也古人敬宗其支庶雖年長行尊者亦皆統焉詩云君之宗之是也斯禮久廢不講然苟於主器承祭之時能深思而默識之則益知宗法之不可不復矣有司羣執事如兄弟服東面北上

註曰士之屬吏也

敖氏曰有司羣執事者公臣私臣之共筮事者也此

時未有賓故有司羣執事皆如賓位西方東面北上
席于門中闌西闕外

註曰為筮人設之也

疏曰士冠禮云筮與席所卦者具饌于西塾乃言布
席于門中筮人執筴抽上韝兼執之此不言具饌于
西塾而經但言席于門中取筮于西塾又不云抽上
韝者皆是互見省文之義

筮人取筮于西塾執之東面受命于主人

註曰筮人官名也筮問也取其所用問神明者謂著也

宰自主人之左贊命命曰孝孫某筮來日某諏此某事適其皇祖某子尚饗

註曰贊命由左者為神求變也士祭也曰歲事此言某事又不言妃者容大祥之後禫月之吉祭某子者祖字也伯子仲子也

疏曰少儀曰贊幣自左詔辭自右此祭祀故宰自左

贊命為神求吉故變於常禮也

敖氏曰儀禮他篇凡於贊命者皆言自右與少儀所謂詔辭自右者合惟此經言自左似無他義蓋字誤耳左當作右來日某亦謂丁若已也某事即歲事也此適其皇祖某子謂主人適其廟而祭之也某子者祖謚也稱其謚則是指大夫之為祖者言也亦假設之辭耳士祭大夫之為祖者其禮如此所以明其從生者之爵也尚饗謂其日若吉則庶幾其神饗之也

下筮尸放此不言以某妃配變於大夫之筮辭也若其祝辭則亦當言之

郝氏曰喪禮命筮日皆自右此自左者筮事祖考不敢以卑禮詔之也某事承上篇為祥禫如謀此禫事之類適皇祖即所附之祖徃祭于其廟

世佐案他篇之辭多見之于記或總錄于經後唯是篇及少牢禮即于序事之間出之亦變體也士祭祖禩言祖而不及禩者祭二廟同日舉其尊者

言也筮日筮尸皆云尚饗者緣孝子孝孫之心以神歆其祀為吉也言某事又不言以某妃配說者遂指為祥禫等祭之證得教說通之足以釋其疑矣特其所釋某事之義亦未為盡善蓋某事者謂如春曰祠事秋曰嘗事之類也宗廟之祭因時異名在周禮有禘禴嘗烝之別而總名之則曰歲事書曰王在新邑烝祭歲是也此云某事少牢云歲事亦取大夫士相變之意若皆曰歲事則又何必空

其文邪

筮者許諾還即席西面坐卦者在左卒筮寫卦筮者執以示主人

註曰士之筮者坐著短由便

疏曰少牢禮立筮三正記云天子著長九尺諸侯七大夫五士三

教氏曰還亦右還也寫卦卦者也

主人受視反之筮者還東面長占卒告于主人占曰吉

註曰長占以其年之長幼旅占之

疏曰士冠禮云筮人還東面旅占明此亦是長幼旅
占經直云長者見從長者為始也

若不吉則筮遠日如初儀

疏曰曲禮云吉事先近日喪事先遠日此尊卑禮同
也又云甸之內曰近某日甸之外曰遠某日此尊卑
有異云甸之內曰近某日據士禮吉事先近日謂祭
祀假令孟月先於孟月上甸內筮筮不吉乃用中甸

之內更筮中旬又不吉更於下旬內筮筮不吉即止
大夫已上假令孟月祭於前月下旬筮來月之上旬
不吉又於孟月之上旬筮中旬中旬不吉又於中旬
筮下旬下旬又不吉即止不祭

教氏曰即於其日改筮之亦見其異於大夫也

世佐案疏說士筮遠日之法及三筮不吉則止不
祭皆誤當以張子及張氏爾岐之說為正俱見士
冠禮

宗人告事畢

右筮日

世佐案此祭前十日內事

前期三日之朝筮尸如求日之儀命筮曰孝孫某諏此
某事適其皇祖某子筮某之某為尸尚饗

註曰三日者容宿賓視濯也某之某者字尸父而名
尸連言其親庶幾其馮依之大夫士以孫之倫為
尸

疏曰前期二日宿賓一日視濯此經乃祭前三日筮尸故鄭云容宿賓視濯言容者為筮尸之後祭日之前有二日容此二事也經直云某之某鄭知字尸父而名尸者曲禮云為人子者祭祀不為尸然則尸卜筮無父者又云卒哭乃諱諱則不稱名故知尸父云某是字尸既對父故某為名大夫士以孫之倫為尸皆取無爵者無問成人與幼皆得為之曾子問曰祭成喪者必有尸尸必以孫孫幼則使人抱之是也若

天子諸侯雖用孫之倫取卿大夫有爵者為之故鳧
鷖詩祭尸之等皆言公尸

敖氏曰如求日之儀兼若不吉而改筮者言也命筮
之辭異故特見之明其餘皆同也

世佐案尸必以孫則尸父即所祭者之子也其或
取諸同姓之適孫則亦其子行也故筮尸必連其
父言之

右筮尸

乃宿尸

疏曰乃緩辭則與筮尸別日矣

從揚氏
圖採入

主人立于尸外門外子姓兄弟立于主人之後北面東

上

註曰不東面者來不為賓客子姓立于主人之後上

當其後

疏曰子姓兄弟北面陪主人後東頭為上者不得過

主人故為上者當主人之後也

敖氏曰上言筮尸如求日之儀則是筮時兄弟咸在所筮者亦存焉筮之而吉不即告之乃於其既歸也然後親宿之于其門者尊之而不敢苟也北面者亦尊尸若不敢必其西面見已然

世佐案尸本主人之弟弟若子行也而及其為尸則又有祖父之象焉故宿之之時面位如是

尸如主人服出門左西面

註曰不敢南面當尊

疏曰此決少牢云主人即位於廟門外之東方南面以其大夫尊有君道故南面當尊此士之孫倫為尸雖被宿猶不敢當尊也

郝氏曰北面事神之禮出門左迎賓之禮

世佐案註意蓋謂主人北面宿尸以事尊者之禮事之尸見主人不南面而西面是不敢以尊者自居也少牢所云乃主人南面之事與此無與疏引之誤

主人辟皆東面北上

註曰順尸

敖氏曰辟者起敬也蓋在尸出門時皆皆子姓兄弟也是時子姓兄弟亦立于主人之後而上當其後也主人再拜尸答拜

註曰主人先拜尊尸

疏曰下文宿賓賓先拜主人乃答拜今此尊尸是以主人先拜也祭少牢云吉則遂宿尸祝擯主人再拜

稽首祝告曰孝孫某云云尸拜許諾祝先釋辭訖尸乃拜此尸答拜後宗人乃擯辭者士尸卑主人拜尸即答拜不得擯辭訖大夫之尸尊尊得釋辭訖乃拜

姜氏曰答拜釋辭皆一時事而文有先後耳疏說蓋
況

世佐祭主人再拜亦稽首不言者文省也尸答拜之節此與少牢禮同姜氏以為文有先後得之疏謂尸有尊卑之辨謬矣

宗人擯辭如初卒曰筮子為某尸占曰吉敢宿

註曰宗人擯者釋主人之辭如初者如宰贊命筮尸之辭卒曰者著其辭所易也

張氏曰如初者如初筮尸曰孝孫某諏此某事適其皇祖某子乃易去下二語而曰筮子為某尸占曰吉敢宿

世佐案某尸謂若皇祖若皇考也

祝許諾致命

註曰受宗人辭許之傳命於尸始宗人祝北面至於傳命皆西面受命東面釋之

教氏曰祝事尸者也故於此即使之致命以見其意云

尸許諾主人再拜稽首

註曰其許亦宗人受於祝而告主人

教氏曰拜稽首亦尊尸也尸既許諾則成為尸故於此不答拜

尸入主人退

註曰相揖而去尸不拜送尸尊

疏曰知有相揖者約少牢云尸送揖不拜也但彼有

送文大夫尊也

從揚氏
圖節本

教氏曰尸既許則有祖道故不俟主人之退而先入
見其尊亦變於大夫尸也先入而不揖辟君禮也聘
禮公與羣臣夕幣乃揖而先入

右宿尸

宿賓賓如主人服出門左西面再拜主人東面答再拜
宗人擯曰某薦歲事吾子將涖之敢宿

註曰薦進也涖臨也言吾子將臨之知賓在有司中
今特肅之尊賓耳

疏曰屬吏有公有司有私臣若在門外時同在門西
東面北上及其入為賓及衆賓者適西階以俟行事
公有司不選為賓者門西北面私臣不選為賓門東

北面

從句讀
節本

又曰宿尸與宿賓中無厥明之文則二者同日明矣

從揚氏
圖採入

教氏曰此云吾子將涖之是鄉者賓既許之矣然則
筮日之後亦當有戒賓之儀如士冠禮所記者經不
見之文畧耳

郝氏曰歲事每歲時祭之事前言諏某事此言歲事
義互備也

張氏曰士前祭二日選屬吏為賓特肅一人以備三

獻屬吏必來助祭故云吾子將泣之

賓曰某敢不敬從主人再拜賓答拜主人退賓拜送

教氏曰主人宿辭擯者釋之是賓之對辭亦擯者傳之矣然則凡主人親戒宿其儀皆然經不盡見之也

右宿賓

世佐案以上二事皆祭前二日為之即筮尸之明日也教云筮尸宿尸宿賓皆同日非

厥明夕陳鼎于門外北西北上有牝

註曰厥其也宿賓之明日夕門外北面當門也

疏曰經直云門外不言門之東西故知當門下篇少牢陳鼎在門東此當門者士卑避大夫故也

敖氏曰門外不言東方可知也北面上亦放祭時陳鼎之位也

於在其南南順實獸于其上東首

註曰順猶從也於之制如今大木舉矣上有四周下無足獸腊也

敖氏曰獸言東首而不及足者以其足左右出故也
郝氏曰櫨輦通形如箱以載獸在鼎南向南直陳

牲在其西北首東足

註曰其西櫨西也東足者尚右也牲不用櫨以其生
疏曰豕不可牽之縛其足陳於門外首北出櫨東其
足寢其左以其周人尚右將祭故也

設洗于阼階東南壺禁在東序豆籩鉶在東房南上几
席兩敦在西堂

註曰東房房中之東當夾北西堂西夾室之前近南耳

疏曰大夫士直有東房西室故他經直言房不言東此經特言東房故註知是房內近東云當夾北者夾室半以南為之以壁外相望則當夾北也夾室在房近東南也云西堂西夾之前近南耳者案爾雅註夾室前堂謂之廂此在西堂在西廂故云西夾之前近南也

教氏曰南上者豆二以並在南二邊次之此未實之
故南上之文惟主於器

郝氏曰洗設于阼階東南堂下也壺有禁在堂上東
牆下豆籩鉶在東房虛器未實皆自南陳而北几席
神座兩敦饋神之器

主人及子姓兄弟即位于門東如初

註曰初筮位也

賓及衆賓即位于門西東面北上

註曰不象如初者以賓在而宗人祝不在

疏曰賓及衆賓即是前者有司羣吏執事當言如初不言者以宰前筮時在門東贊主人辭今宰在門西同行又宗人祝離位賓西北東面南上異於筮位時故也

教氏曰此時方修祭事助祭之賓宜來視之以其不在羣者有司羣執事之中故此雖東面北上而不蒙如初之文賓既位於此則公臣私臣不敢與之齒而

位於他所矣下文云宗人祝立于賓西北東面南上
又記曰公有司門西北面東上私臣門東北面西上
足以明祭時有司之屬不在賓位也審矣

世佐案賓僚友來助祭者也與有司羣執事自別
註疏一之非當以教說為正

宗人祝立于賓西北東面南上

註曰事彌至位彌異宗人祝于祭宜近廟

疏曰宗人祝近門離本位故云位彌異

敖氏曰南上宜變於賓

主人再拜賓答再拜三拜衆賓衆賓答再拜

註曰衆賓再拜者士賤旅之得備禮也

疏曰有司徹主人三拜衆賓皆答一拜卿大夫尊賓賤純臣不再拜者避國公此士賤得備禮

敖氏曰衆賓答一拜言再者字誤也

世佐案此士旅拜法也說見鄉飲酒禮敖說非

主人揖入兄弟從賓及衆賓從即位于堂下如外位

註曰為視濯也

教氏曰如外位則宗人祝皆在其中矣不言者省文也

宗人升自西階視壺濯及豆籩反降東北面告濯具

註曰濯漑也不言敦鉶者省文也東北面告緣賓意欲聞也言濯具不言絜以有几席

疏曰主人在東階下宗人降自西階宜東面告乃行至賓南而東北面告者欲兼聞之於賓也几席不洗

者告具而已

參用句讀及揚氏圖節本

敖氏曰宗人亦既立於賓西北之位乃升於壺言濯以見其餘不言敦劔几席省文也東北面鄉主人濯具謂所濯者已具也此亦有不必濯者乃云濯具者總言之耳

郝氏曰告濯告既洗也告具告既備也

世佐案告濯具之解敖說似勝

賓出主人出皆復外位

註曰為視牲也

敖氏曰惟言賓主人出文又省矣

宗人視牲告充雍正作豕

註曰充猶肥也雍正官名也北面以策動作豕視聲氣

疏曰案禮記內則周禮庖人職云豕望視而交捷腥不云豕之聲氣而正云視聲氣者但祭祀之牲當充盛肥若聲氣不和即是疾病不堪祭祀

郝氏曰雍正饗人之長主烹飪者

宗人舉獸尾告備舉鼎饗告絜

註曰備具

敖氏曰此所告之儀亦皆東北面

郝氏曰舉獸尾視腊全也啟鼎蓋視其潔也

請期曰羹飪

註曰謂明日質明時而曰肉熟重豫勞賓宗人既得

期西北面告賓有司

教氏曰請期而主人自告之亦異于大夫請期蓋東面既得期西北面告賓東北面告兄弟

郝氏曰請期請明日祭之早晏羹飪以煮肉熟為節世佐案請宗人請也曰主人曰也

告事畢賓出主人拜送

教氏曰送于外門外

世佐案告亦宗人告也

右視濯視牲為期

世佐案此祭前一日事

夙興主人服如初立于門外東方南面視側殺

註曰主人服如初則其餘有不立端者側殺殺一牲也

敖氏曰東方蓋當東塾少南鼎之西也

張氏曰自此至立于中庭言祭日陳設及位次之事
主人服如初謂立端也案下記惟尸祝佐食與主人
同服賓及兄弟筮日筮尸視濯亦立端至祭日則皆

朝服玄冠緇帶緇鞶

主婦視饎爨于西堂下

註曰炊黍稷曰饎宗婦為之爨竈也西堂下者堂之
西下也近西壁南齊于坵

敖氏曰視之當東面爨亦東面

亨于門外東方西面北上

註曰亨煮也煮豕魚腊以鑊各一爨詩云孰能亨魚
溉之釜鬻

敖氏曰此亦以亨者見爨之面位也東方於陳鼎之處則又東矣北上豕爨在北魚腊亞之

羹飪實鼎陳于門外如初

註曰初視濯也

世佐案如初者如其北面北上有罪也

尊于戶東玄酒在西

註曰戶東室戶東玄酒在西尚之凡尊酌者在左

張氏曰鄭註云凡尊酌者在左玄酒不酌故在右是

以東西為左右少儀云尊者以酌者之左為上尊又據酌者北面臨尊而言左右以西為左其位置雖同而言有殊也

實豆籩鉶陳于房中如初

註曰如初者取而實之既而反之

敖氏曰如初亦如其南上之位也記曰賓與長兄弟之薦自東房其餘在東堂然則祝主人主婦賓長長兄弟之豆籩亦皆二以並相繼而陳之于鉶之北矣

郝氏曰實豆籩鉶以脯醢和羹之類

執事之俎陳于階間二列北上

註曰執事謂有司及兄弟二列者因其位在東西祝主人主婦之俎亦存焉不升鼎者異於神

敖氏曰執事謂凡執祭事者也主人及祝以下之通稱其俎二列北上東列則阼俎為上西列則祝俎為上其內兄弟之俎則當次于兄弟也此執事之文所包者廣與前後所云者不同

盛兩教陳于西堂藉用萑几席陳于西堂如初

註曰盛黍稷者宗婦也萑細葦

教氏曰盛乃藉之重黍稷也

尸盥匱水實于槃中簞巾在門內之右

註曰設盥水及巾尸尊不就洗又不揮門內之右象
洗在東統于門東西上凡鄉內以入為左右鄉外以
出為左右

疏曰揮振去水使手乾門右據鄉內以入為右者

從楊

氏圖

節本

敖氏曰亦匱在槃中南流簞巾在其右盥以槃匱說
見公食大夫禮

郝氏曰簞竹器以盛中在廟門內右內以西為右尸
入于此盥手

張氏曰以匱貯水而置之槃待尸盥則執匱沃水而
槃承之簞巾簞巾中貯巾也門內之右門東也

世佐案下經云尸入門左北面盥則槃匱之屬在

門內之西明矣門西曰右者從堂上視之也必在
門西者取其便于尸盥且與洗位相變也郝說得
之註疏及張說皆非是

祝筵几于室中東面

註曰為神敷席也至此使祝接神

教氏曰几亦右之

世佐案室中東面謂在奧也

右視殺視饗陳設

主婦纚笄宵衣立于房中南面

註曰主婦主人之妻雖姑存猶使之主祭祀纚笄首服宵綺屬也此衣染之以黑其繒本名曰宵詩有素衣朱宵記有玄宵衣凡婦人助祭者同服也內則曰舅沒則姑老冢婦所祭祀賓客每事必請於姑

郝氏曰纚以韜髮笄簪也宵衣黑色衣詳見昏禮房中婦人所有事南面向堂也

主人及賓兄弟羣執事即位于門外如初

教氏曰此於賓兄弟之下言羣執事則是指公有司
私臣而言也宗人祝亦在賓西北其他則在門西若
門東與其在內位同上經不見門東門西之位而亦
云如初者其文主於兄弟以上而略於羣執事也

宗人告有司具

註曰具猶辦也

教氏曰告主人也告之亦宜東北面既告則反于賓
西北

主人拜賓如初揖入即位如初

註曰初視濯也

佐食北面立于中庭

註曰佐食賓佐尸食者立于宗人之西

疏曰案下記云佐食當事則戶外南面無事則中庭北面此經謂無事時也又云主人行事阼階宗人亦在阼階南擯主人佐食北面于中庭明其宗人之西可知

教氏曰佐食主人兄弟之佐尸食者記云佐食於旅齒於兄弟是也。擯於門外猶在兄弟之位至此乃立于中庭以事將至宜異其位也。此中庭謂東西之中其南北則參分庭一在北與

郝氏曰佐尸食者不與衆有司混處敬神事也

世佐案佐食蓋以私臣為之註及教說皆非是

右即位

主人及祝升祝先入主人從西面于戶內

註曰祝先入接神宜在前也少牢饋食禮曰祝盥于洗升自西階主人盥升自阼階祝先入面南

敖氏曰及祝則是主人先升也先升後入蓋俟於堂張氏曰自此至主人再拜稽首言主人主婦祝佐食初行陰厭之祭註引少牢者明此經主人及祝盥升面位亦與彼同也

世佐案升自堂下位升也是時主人與祝皆已即位于廟門內矣郝云自門外入非入室也

主婦盥于房中薦兩豆葵菹蜩醢醢在北

註曰主婦盥盥于內洗昏禮婦洗在北堂直室東隅
宗人遣佐食及執事盥出

註曰命之盥出當助主人及賓舉鼎

敖氏曰此執事謂左人及取俎七者賤於右人故先
出

世佐案宗人既遣佐食及執事亦遂盥而出矣故
下經云宗人執畢先入

主人降及賓盥出主人在右及佐食舉牲鼎賓長在右及執事舉魚腊鼎除鼈

註曰及與也主人在右統於東主人與佐食者賓尊不載少牢饋食禮魚用鮒腊用麋士腊用兔

疏曰鼎在門外北上東為右人西為左人右人尊入時在鼎前左人卑入時在鼎後又盡載牲體于俎又設俎于神坐之前賓主當相對為左右以賓尊不載牲體故使佐食對主人使賓為右人而使執事在

左而載也

教氏曰主人降亦宗人詔之也賓長在右謂長賓在魚鼎之右衆賓長在腊鼎之右也凡吉事除鼎于外凶事除鼎于內除鼎亦右人

宗人執畢先入當作階南面

註曰畢狀如叉蓋為其似畢星取名焉主人親舉宗人則執畢導之既錯又以畢臨匕載備失脫也雜記曰柶用桑長三尺畢用桑長三尺刊其本與末杞畢

同材明矣今此杞用棘心則畢亦用棘心舊記云畢似御他神物神物惡桑義則少牢饋食及虞無義何哉此無義者乃主人不親舉耳少牢大夫祭不親舉虞者祭也主人未執事祔練祥執事用桑義自此純吉用棘心義

敖氏曰宗人執畢所以指教其錯鼎之處也故宜先入當阼階南面者示其當錯於此為之節也鼎入設當阼階士禮也大夫則當東序國君則

在碑南此用畢者以主人親舉重其事也鼎既錯則反之於外而復位與大射儀曰小臣師設楅廋馬正東面以弓為畢則畢但主於指教設器者明矣

世佐案用畢之故當以教說為正註備失脫及御他神物之說似曲

鼎西面錯右人抽扃委于鼎北

註曰右人謂主人及二賓既錯皆西面俟也

敖氏曰鼎錯於東方西面順主人之面位也上者亦
南于洗西

贊者錯俎加匕

註曰贊者執俎加匕從鼎入者其錯俎東縮加匕東
柄既則退而左人北面也

疏曰少牢云俎皆設于鼎西肆又云匕皆加于鼎東
枋

敖氏曰贊者取匕俎于東塾東

世佐案贊者蓋三人各執一俎一匕也士虞禮匕俎在西塾之西此不著其處以吉凶相變之義推之則教說其或然與

乃杞

註曰右人也尊者於事指使可也左人載之

敖氏曰杞亦當作匕

佐食升斝俎鼎之設于阼階西

註曰斝謂心舌之俎也郊特牲曰胙之為言敬也言

主人之所以敬尸之俎

疏曰下記云所俎心舌皆去本末午割之實於牲鼎
載心立舌縮俎是也引郊特牲者見敬有胙俎送于
尸前

敖氏曰以少牢饋食禮例之則此亦古人先升心舌
而佐食載惟言佐食升之其文省與設之蓋亦西縮
鼎當作俎

卒載加匕于鼎

註曰已載畢亦加焉

主人升入復位

敖氏曰賓七者於是亦復位

郝氏曰復戶內西面之位

俎入設于豆東魚次腊特于俎北

註曰入設俎載者腊特饌要方也凡饌必方者明食
味人之性所以正

敖氏曰少牢禮曰序升自西階相從入

世佐案此設俎之法與士昏禮同牢之饌同

主婦設兩敦黍稷于俎南西上及兩鉶芼設于豆南南

陳

註曰宗婦不贊敦鉶者以其少可親之

疏曰案少牢主婦設金敦宗婦贊三敦以其多故使
宗婦贊此士祭祀二敦少故不使宗婦贊主婦可親
也

教氏曰宗婦不贊敦鉶者辟內子禮也凡敦鉶皆特

執於少牢禮備見之

郝氏曰兩敦黍在豕南稷在黍東魚南黍在西為上
兩劔笔接葵菹而南

世佐案西上者東陳南陳者北上也劔以先設者
為上宗婦不贊之義教得之

祝洗酌奠奠于劔南遂命佐食啟會佐食啟會郤于敦
南出立于戶西南面

註曰酌奠奠其爵解少牢饋食禮啟會乃奠之

疏曰引少牢者彼大夫禮與此士禮相變是以異

教氏曰酌奠酌其所奠之酒也不云酒而云奠因事
名之

郝氏曰立于室戶西南面士虞記所謂負依也

主人再拜稽首祝在左

註曰祝在左當為主人釋辭于神也祝祝曰孝孫某
敢用剛鬣嘉薦普淖用薦某事於皇祖某子尚饗
教氏曰主人拜為食具也

世佐案此下不云祝祝及其辭蓋闕文也以少牢
禮例之可見士虞記云吉祭猶未配然則士之常
祭無不配矣此祝辭亦當云以某妃配某氏如少
牢所云也

儀
禮
集
編
卷
三
十
四

欽定四庫全書

儀禮集編卷三十五

龍里縣知縣盛世佐撰

特牲饋食禮第十五之二

祝迎尸于門外

註曰尸自外來代主人接之就其次而請不拜不敢
與尊者為禮周禮掌次凡祭祀張尸次

敖氏曰迎尸不拜者禮不主于已代主人迎之耳其

或有拜妥尸之類乃從於主人為之也門廟門

張氏曰自此以下言迎尸入行正祭初尸食九飯次主人酌尸次主婦亞獻尸次賓長三獻尸次獻賓及兄弟次長兄弟為加爵次衆賓長為加爵次嗣舉奠次旅酬次佐食獻尸凡十節事尸者八節其獻賓及兄弟與旅酬皆承尸意而行神忠者也此九飯節內有妥尸祝饗有接祭有三飯有再三飯有終三飯有盛斝俎又共六細節

主人降立于阼階東

註曰主人不迎尸成尸尊尸所祭者之孫也祖之尸則主人乃宗子禰之尸則主人乃父道事神之禮廟中而已出迎則為厭

疏曰祭統云君迎牲而不迎尸別嫌也尸在廟門外則疑於臣在廟中則全於君君在廟門外疑於君入廟門則全於臣全於子

教氏曰阼階東亦直序西面主人位於此則子姓兄

弟在主人之南者其亦南於洗西與

尸入門左北面盥宗人授巾

註曰侍盥者執其器就之執箠者不授巾賤也宗人授巾庭長尊少牢饋食禮曰祝先入門右尸入門左疏曰上經陳盥在門右今尸入門左尸尊不就盥槃匱中等鄉門右就之

世佐案盥器設于門西故尸入門左即得於此焉盥也註云執其器就之蓋亦自文其說之過與

尸至于階祝延尸尸升入祝先主人從

註曰延進在後詔侑曰延禮器所謂詔侑武方者也
少牢饋食禮曰尸升自西階入祝從主人升自阼階
祝先入主人從

張氏曰詔侑武方彼註武無也引少牢者見此經尸
入次序與彼同法也

尸即席坐主人拜妥尸尸答拜執奠祝饗主人拜如初
註曰饗勸彊之也其辭取于士虞記則宜云孝孫某

主為孝薦之饗舊記云明薦之

教氏曰饗饗神也凡饗祝之辭雖或言於尸之前實
主為神也如初再拜稽首也

祝命接祭尸左執觶右取菹換于醢祭于豆間

註曰命詔尸也接祭祭神食也士虞禮古文曰祝命
佐食墮祭周禮曰既祭則藏其墮墮與接讀同耳換
醢者染于醢

疏曰祭神食者向者陰厭厭飫神今尸祭訖當食神

餘也

從楊氏
闕節本

敖氏曰接祭即授祭也接字蓋誤祝命佐食授尸祭尸於是祭薦欲及其授祭之節也

張氏曰接陸氏作許恚反註云墮接讀同墮亦作呼回反墮取降下接取切摩各於祭義有似也

世佐案命命佐食也接墮通祝命佐食墮下其所當祭之物以授尸即謂黍稷肺祭也士虞禮言命墮祭於尸祭薦之下此言於其上其節同也特文

有先後耳註誤換擣通

佐食取黍稷肺祭授尸尸祭之祭酒啐酒告旨主人拜
尸奠解答拜

註曰祭酒穀味之芬芳者齊敬共之惟恐不美告之
美遠其心明神享之

世佐案尸告旨而主人先拜者拜其享也

祭鉶嘗之告旨主人拜尸答拜

註曰鉶肉味之有菜和者曲禮曰客絮羹主人辭不

能亨

疏曰引曲禮者證釃羹有五味調和故告旨絮者調和之義

祝命爾敦佐食爾黍稷于席上

世佐案此爾敦併及稷者吉祭之禮務詳也士虞禮則舉黍而已

設大羹湑于醢北

註曰大羹湑不和貴其質設之所以敬尸也不祭不

齊大羹不為神非盛者也士虞禮曰大羹湑自門入
疏曰云醢北者為薦左案公食大夫昏禮大羹湑皆
在薦右此在左者禮神禮變於生人士虞禮大羹湑
設於銅南在右與生人同有不忍異于生故也云不
為神者陰厭時未設尸來始設為尸故士虞記云無
尸則不接祭無大羹湑祗從獻

舉肺脊以授尸尸受振祭齊之左執之

註曰肺氣之主也脊正體之貴者先食啗之所以導

食通氣

乃食食舉

註曰舉言食者明凡解體皆連肉

疏曰乃食謂食肺云食舉謂骨體正脊從俎舉鄉口

因名體為舉

敖氏曰乃食乃以右手食食也既食食則食舉所以
安之

姜氏曰乃食則固食舉矣又言食舉者起下文之詞

疏不明此故誤分上下為各食其一也

世佐案乃食食黍也舉即肺脊也士昏禮云贊爾黍授肺脊皆食以涪醬皆祭舉食舉也此食法蓋與彼同唯不以涪醬為異疏誤當以教說為正姜氏以此二句分屬上下節亦非

主人羞所俎于腊北

註曰所俎主于尸主人親羞敬也神俎不親設者貴得賓客以神事其先

疏曰所俎尸入乃設之故知主於尸

教氏曰不言降與升文省少牢禮曰主人羞所俎升自阼階

郝氏曰所俎在阼階西羞進也

尸三飯告飽祝侑主人拜

註曰三飯告飽禮一成也侑勸也或曰又勸之使又食少牢饋食禮侑辭曰皇尸未實侑也

教氏曰此祭以饋食為名故當食而尸尤尊雖主人

拜亦不答也

佐食舉幹尸受振祭濟之佐食受加于所俎舉獸幹魚
一亦如之

註曰幹長脅也獸腊其體數與牲同

敖氏曰此一舉也凡於尸每食必舉牲體若骨者明
主人以此供尸食也是雖連舉三俎之實然同時相
接為之故但主於牲而摠為一舉耳下文放此

尸實舉于菹豆

註曰為將食庶羞舉謂肺脊

敖氏曰於既三飯而奠舉士吉祭之禮然爾士虞則不食舉卒食乃授之是其異也

郝氏曰尸以左手所執肺脊實于菹豆不實于所俎者所俎在腊北遠也

佐食羞庶羞四豆設于左南上有醢

註曰衆羞以豕肉所以為異味四豆者脩炙載醢南上者以脩炙為上以有醢不得爭也

疏曰公食大夫禮云炙南醢以西牛臠牛鮓註云
先設醢爭之以次也此四豆有醢則不得先設非爭
之次故也又惟一醢不得與臠炙相對相對之法炙
在南醢在北臠在北醢在南

敖氏曰少牢饋食禮羞兩臠兩醢此亦當放之也左
亦醢之北潛之南也南上者臠醢相間兩臠各在醢
之南也四豆乃不續者統於正豆也正豆兩而為一
列故此豆雖有四亦不宜續以異之

郝氏曰庶羞設于大羹北尸在西以北為左南上上大羹自南陳而北也有醢二醢二羞也醢在馘南四豆道陳不績故曰南上

世佐案庶羞豕馘醢也四豆以少牢禮例之其馘醢各二與左大羹北也南上馘為上也

尸又三飯告飽祝侑之如初

註曰禮再成也

姜氏曰如初謂主拜

舉骼及獸魚如初

註曰獸魚如初者獸骼魚一也

敖氏曰此再舉也

郝氏曰豕後足骨曰骼獸亦舉骼魚亦舉一

姜氏曰如初謂祭齋

世佐案亦加于所俎

尸又三飯告飽祝侑之如初

註曰禮三成

舉肩及獸魚如初

註曰不復飯者三三者士之禮大成也舉先正脊後肩自上而卻下絳而前終始之次也

疏曰先舉正脊自上也次舉脅即卻也後舉骼即下絳也終舉肩即前也前者牲體之始後者牲體之終教氏曰此三舉也獸謂獸肩

世佐案註云自上而卻下者謂由脊而及脅也云絳而前者謂由骼而及肩也卻猶退也絳猶屈也

疏分句似未審

佐食盛所俎俎釋三个

註曰佐食取牲魚腊之餘盛于所俎將以歸尸俎釋
三个為餘改饌於西北隅遺之所釋者牲腊則正脊
一骨長脅一骨及臠也魚則三頭而已

疏曰案下記云尸俎右肩臂臠肱正脊二骨橫脊
長脅二骨短脅今尸舉正脊一骨長脅一骨及骼肩
則脊脅各有一骨在前脚三節後脚二節各舉其一

訖前脚舉肩訖宜次盛臂後脚舉胛訖宜次盛肫前
後各一節及橫脊以歸前脚唯有髀在并脊脅各一
骨為三也

揚氏曰前已舉四體外今宜盛臂肫橫脊短脅故知
所釋者唯此耳

敖氏曰俎釋三个不可遽空神俎也少牢饋食禮於
每牲之俎惟釋脊脅皆俎實之下者也然則此牲俎
之所釋者亦宜放之其正脊長脅短脅與腊俎三个

蓋如牲俎也

舉肺脊加于斝俎反黍稷于其所

註曰尸授佐食佐食受而加之反之也肺脊初在豆

豆
敖氏曰此蒙佐食之文皆謂佐食舉之反之也其所
俎南也

右迎尸正祭

主人洗角升酌醕尸

註曰醕猶行也是獻尸也云醕者尸既卒食又却頤
衍養樂之不用爵者下大夫也因父子之道質而用
角角加人事略者

疏曰不用爵次當用觚而用角者因無臣助祭父子
相養之道是質云人事略得用功少也

從楊氏
闕節本

張氏曰此初獻節內有主人獻尸有尸醕主人且親
嘏有主人獻祝主人獻佐食凡四細節

尸拜受主人拜送尸祭酒啐酒賓長以肝從

疏曰亦當如少牢用俎縮執俎肝亦縮進末鹽在右
尸左執角右取肝換于鹽振祭濟之加于菹豆卒角祝
受尸角曰送爵皇尸卒爵主人拜尸答拜

註曰曰送爵者節主人拜

敖氏曰云皇尸卒爵明主人當送之也後言之者見
送爵之辭為指主人

右主人酌尸

祝酌授尸尸以醋主人

註曰祝酌不洗尸不親酌尊尸也古文醋作酢

主人拜受角尸拜送主人退佐食授接祭

註曰退者進受爵反位尸將嘏主人佐食授之接祭亦使祭尸食也其授祭亦取黍稷肺祭

敖氏曰此接字亦因與授字相類而行也以神俎敷之黍稷肺祭授之者象尊者賜之食然

世佐案授接祭者以其所墮下之祭授主人也授接連文則接非授字之誤明矣敖又以此接字為

衍汰哉又案楊本註中反位之下有受亦當為授
四字然則授授之授經本作受而註改之邪諸本
並無此四字未知楊氏何所據也

主人坐左執角受祭祭之祭酒啐酒進聽嘏

註曰聽猶待也受福曰嘏嘏長也大也待尸授之以
長大之福也

敖氏曰進聽嘏進于尸前而聽其嘏已之辭下文云
親嘏主人是也又以少牢饋食禮之所言者參之則

此嘏云者蓋致福於人之稱

郝氏曰嘏假通尸傳神意以福假主人

佐食擗黍授祝祝授尸尸受以菹豆執以親嘏主人

註曰獨用黍者食之主其辭則少牢饋食禮有焉

疏曰少牢云祝以嘏于主人曰皇尸命工祝承致多

福無疆于女孝孫來女孝孫使女受祿于天宜稼于

田眉壽萬年勿替引之

敖氏曰饋食之禮主于黍稷而黍又其尊者故特取

之以通其意焉少牢饋食禮所載嘏辭乃祝傳尸嘏者也此尸親嘏其辭之首與彼異

郝氏曰搏黍捏黍飯成團象福祿獨搏黍黍貴于稷尸食惟黍

張氏曰少牢命祝致嘏故云皇尸命工祝此尸親嘏當省去此語直用承致多福以下

主人左執角再拜稽首受復位詩懷之實于左袂挂于季指卒角拜尸答拜

註曰詩猶承也謂奉納之懷中季小也實于左袂挂祛以小指者便卒角也少牢饋食禮曰興受黍坐振

祭噉之

世佐案註季小之小釋文作少詩召反下同

敖氏曰左執角為右手將有事也詩字未詳或曰敬慎之意內則曰詩負之亦此意也拜不奠爵受黍不祭皆異於大夫也季指左手之小指也挂祛於指以黍在袂中故也古者祛挾於袂然猶挂之者慮拜時或遺落也主人拜受黍而尸不答拜者以其受神惠

故也

郝氏曰詩言志也詩序云詩者志之所之內則云詩負之言專志也懷藏也

世佐案凡拜必奠爵慮傾出也執爵而拜者唯婦人立拜則可耳此云主人左執角再拜稽首受不言奠角興者文略也少牢云主人坐奠爵興再拜稽首興受黍

主人出寫嗇于房祝以籩受

註曰變黍言嗇因事託戒欲其重稼嗇嗇者農力之
成功

敖氏曰出亦執角以出也邊虛邊也此單言嗇少牢
言嗇黍未詳

郝氏曰出出室寫傾也嗇牆通即黍以邊受所寫黍
重神貺也

右尸酢主人

筵祝南面

註曰主人自房還時

敖氏曰筵祝蓋於其立處之西亦有司為之下放此
郝氏曰南面室內當戶

主人酌獻祝祝拜受角主人拜送設菹醢俎

註曰行神惠也先獻祝以接神尊之菹醢皆主婦設
之佐食設俎

疏曰佐食接尸故後獻之祝接神先獻之

敖氏曰士虞與少牢禮皆云祝與佐食坐受爵此不

言坐如之可知菹醢葵菹蜎醢也

郝氏曰獻祝與佐食皆因獻尸及之角即獻尸之角
姜氏曰註亦臆詞據經惟前獻尸時主婦設菹醢後
亞獻及致爵時主婦設籩豆而巳經例凡不言主人
主婦親設者皆有司為設之

祝左執角祭豆興取肺坐祭濟之興加于俎坐祭酒啐
酒

敖氏曰此離肺也當奠角乃興取肺坐絕祭濟之既

執角乃祭酒不言奠角執角與絕者亦文略耳記曰
祝俎離肺一

以肝從祝左執角右取肝換于鹽振祭齊之加于俎卒
角拜主人答拜受角

敖氏曰肝加于俎辟尊者禮也下文主人主婦之儀
亦故此少牢饋食禮曰不興加于俎

酌獻佐食佐食北面拜受角主人拜送佐食坐祭卒角
拜主人答拜受角降反于篚升入復位

疏曰獻佐食不言俎者上經云執事之俎陳于階間
二列北上鄭註云執事謂有司以佐食亦在有司內
者下記云佐食俎斲脊脅也又下經賓長獻節鄭
註云凡獻佐食皆無從其薦俎獻兄弟以齒設之
郝氏曰角實于篚在堂下既獻反之升入升堂入室
復戶內西向之位佐食獨不設俎者以兄弟為之其
薦俎齒于兄弟中于後獻衆兄弟時并設也

世佐案獻佐食之禮惟致爵而已不布席無薦設

無從皆殺于祝也其受獻之位蓋北面於尸席前

右主人獻祝佐食

主婦洗爵于房酌亞獻尸

註曰亞次也次猶貳主婦貳獻不夾拜者士妻儀簡耳

疏曰少牢主婦亞獻尸時夾拜此士妻下之故云儀簡耳

教氏曰亞獻更用爵以見主人之用角者有為為之

耳獻以爵正禮也獻尸不夾拜辟內子之禮也

張氏曰此下主婦亞獻節內有獻尸有尸醋有獻祝有獻佐食亦四節

世佐案此爵亦角也變角言爵見其不仍初獻之器耳初獻用角為下大夫則主婦獨不當辟內子邪教說蓋誤此爵貯于內篚

尸拜受主婦北面拜送

註曰北面拜者辟內子也大夫之妻拜於主人北西

面

疏曰少牢西面拜註不北面辟人君夫人然則士妻
賤不嫌得與人君夫人同也

郝氏曰室內北面變于主人之西面也

宗婦執兩籩戶外坐主婦受設于敦南

註曰兩籩棗栗棗在西

敖氏曰宗婦贊豆籩戶外坐士祭禮然也少牢饋食
禮主婦與贊者授受于室中亦異者也士虞禮籩設

于會南此宜如之乃不云會者可知也

祝贊籩祭尸受祭之祭酒啐酒

註曰籩祭棗栗之祭其祭之亦於豆祭

兄弟長以燔從尸受振祭濟之反之

註曰燔炙肉也

疏曰反之謂反燔于長兄弟

郝氏曰兄弟之長者以燔肉實羞俎從主婦薦尸尸

受燔祭之濟之反于羞俎

羞燔者受加于所出

註曰出者俟後事也

疏曰謂俟主婦獻祝之時更當羞燔于祝

郝氏曰兄弟長以所反燔加所俎上執虛俎出反門外西塾不備言與虞禮互見也

世佐案士虞禮云羞燔俎在內西塾上以吉凶相變之義推之則此羞俎當在門內東塾也郝云反門外西塾非

尸卒爵祝受爵命送如初

註曰送者送卒爵

郝氏曰祝命送命主婦拜也即前云送爵皇尸卒爵命主婦拜如主人也

右主婦獻尸

酢如主人儀

註曰尸酢主婦如主人儀者自祝酌至尸拜送如酢主人也不易爵辟內子

世佐案男女不相襲爵此不言易爵文省也註云
辟內子似泥然則所謂如主人儀者亦大略言之
耳

主婦適房南面佐食授祭主婦左執爵右撫祭祭酒啐
酒入卒爵如主人儀

註曰撫授祭示親祭佐食不授而祭於地亦儀簡也
入室卒爵於尊者前成禮明受惠也

教氏曰房中南面主婦之正位也經因事見之祭亦

謂黍稷肺祭也佐食授祭主婦撫之而不取亦異於
內子也既撫則佐食以祭置于地主婦入于室中北
面而立飲如主人儀謂卒爵拜尸答拜也入室卒爵
亦以鄉者於此拜受故也

右尸酢主婦

獻祝籩燔從如初儀

敖氏曰主婦當更酌洗于房中乃酌獻祝略如內子
之禮蓋男子不承婦人爵也初儀即主人獻祝之禮

此惟無祭俎一節餘則如之也籩與豆燔與肝雖異其祭之儀則同故亦蒙如初祝亦兩邊其設之棗在菹西栗在棗南

及佐食如初卒以爵入于房

註曰及佐食如初如其獻佐食則拜主人之北西面也

敖氏曰初者亦主人獻佐食之儀少牢禮主婦獻祝及佐食皆西面於主人之北答拜之

世佐案云及者蒙獻祝之文也以虛爵入房仍奠于內篚

右主婦獻祝佐食

賓三獻如初燔從如初爵止

註曰初亞獻也尸止爵者三獻禮成欲神惠之均於室中是以奠而待之

疏曰自此盡卒復位論賓長獻尸及佐食并主人主婦致爵之事此一科之內乃有十一爵賓獻尸一也

主婦致爵於主人二也主人酢主婦三也主人致爵于主婦四也主婦酢主人五也尸舉奠爵酢賓長六也賓長獻祝七也又獻佐食八也賓又致爵於主人九也又致爵於主婦十也賓獻主人酢十一也待均者謂尸得三獻祝與佐食亦得三獻主人主婦各得一酢而已待主人主婦致爵乃均也

敖氏曰不言洗爵升酌可知也如初謂尸拜受主婦拜送也尸於舉酌之末亦欲主人而下皆受舉爵之

禮故止爵以見其意於是主人主婦交相致爵既而遂獻賓以至於私人而終尸意焉其爵止之節在羞燔者出之時也賓長亦出而復位

張氏曰自主婦致爵主人以下皆所謂均神惠於室中者約畧分之為六節

右賓獻尸爵止

席于戶內

註曰為主人鋪之西面席自房來

敖氏曰設席蓋於主人所丘處之南席亦南上未受爵而設席變於大夫

主婦洗爵酌致爵于主人主人拜受爵主婦拜送爵

註曰主婦拜於北面也

敖氏曰是亦獻也乃不云獻者酒乃已物不可以獻為名故謂之致爵亦拜受于席

宗婦贊豆如初主婦受設兩豆兩籩

註曰初贊臣獻也主婦薦兩豆籩東面也

教氏曰贊豆贊豆與籩也此豆兼籩言之省文耳如
初戶外坐也主婦受於戶外而設於席前其豆則菹
在北其籩則棗在菹北粟在棗西也設豆東面設籩
南面與此宗婦贊者亦一人耳既授兩豆復取兩籩
于房

俎入設

註曰佐食設之

疏曰有司下大夫不儻尸者主婦致爵于主人時佐

食設俎彼室內行事與士禮略同故鄭知佐食設之也

郝氏曰設俎則宗人也

世佐案宗人詔禮不可使之設俎郝說非當以註疏為正

主人左執爵祭薦宗人贊祭奠爵興取肺坐絕祭齊之興加于俎坐扱手祭酒啐酒

註曰絕肺祭之者以離肺長也少儀曰牛羊之肺離

而不提心豕亦然。扱手者為絕肺染汙也。忖肺不扱手。

疏曰：少儀註云：提猶絕也。不絕中央少許者，引之證離肺長而不絕，故須絕之。云忖肺不扱手者，以其先已斷絕，取祭之不須以手絕之，故不扱手也。

敖氏曰：此贊祭薦蓋以籩祭，授之祭離肺之儀。鄉飯酒禮備矣。

肝從左執爵取肝，換于鹽坐，振祭，齎之。宗人受加于俎。

燔亦如之

註曰一酌而備再從而次之亦均

疏曰此決上主人獻尸賓長以肝從主婦獻尸兄弟以燔從今一酌而肝燔從則與尸等故云亦均

敖氏曰坐字衍宗人既受肝則主人復右執爵矣一進酒而兩進從俎者欲其與尸祝之兩獻者同見其尊也主婦禮亦如之

世佐案以肝燔從者亦長兄弟也云坐者見其已

啐酒則興取肝也凡振祭皆坐特於此見之耳教
云衍非

興席末坐卒爵拜

註曰於席末坐卒爵敬也

敖氏曰席末席上之北不降席者亦因尸禮也

郝氏曰席末坐避尊也

主婦答拜受爵酌醋左執爵拜主人答拜坐祭立飲卒
爵拜主人答拜主婦出反于房

教氏曰酢不易爵者禮婦人承男子後多不易爵則其自酢又可知矣主婦自酢者主人辟尸不敢酢主婦主婦達其意也下自酢之義皆類此反奠爵于篚也左字非誤則衍內則曰凡女拜尚右手

郝氏曰主婦左執爵拜不奠爵婦人立拜也

世佐案婦人仍男子之爵惟夫婦耳其他則固不相襲也左執爵而拜者肅拜也教以內則文決經文之誤非

右主婦致爵于主人自酢

主人降洗酌致爵于主婦席于房中南面主婦拜受爵
主人西面答拜宗婦薦豆俎從獻皆如主人

教氏曰不言升酌文省耳主人與主婦亦謂之致爵
者夫妻一體也主婦席面變於大夫不賓尸之禮也
亦拜受于席豆亦兩豆兩籩俎特牲也從獻肝燔也
皆如主人謂其受爵以前之禮也所異者其不用贊
與此席蓋於房中之北堂

主人更爵酌醋卒爵降實爵于篚入復位

註曰主人更爵自酢男子不承婦人爵也祭統曰夫婦相授受不相襲處酢必易爵明夫婦之別

疏曰案下記設洗篚在洗西實二爵鄭註云二爵者為賓獻爵止主婦當致也此賓長所獻爵尸奠之未舉其篚唯一爵得云易者上主婦亞獻洗爵于房中則房中有爵又主婦獻祝及佐食訖以爵入于房後主婦致爵于主人還是房內爵後主人致爵于主

婦者是下篚之爵主婦飲訖實于房中之篚主人更取房內之爵以酌酢酢訖奠于下篚

教氏曰更爵更取在內篚者也男子不承婦人爵雖自醋猶更之內篚在洗東乃不因而洗之者以其自醋也自醋而不洗亦因尸之醋禮也此醋亦在房中西面其他儀皆與主婦自醋者畧同以有成禮故畧而不見之卒爵則坐惟此與主婦異耳位室中位凡男子易爵于內篚惟醋于房中者得由便為之不然

則否

郝氏曰卒爵不坐夫飲婦爵禮畧也

世佐案主人取下篚之爵致于主婦主婦飲訖還授主人主人以降奠于篚乃更爵自酢也必更之者夫尊也下篚唯有二爵其一尸奠之未舉則主人所更者乃觚也觚亦稱爵者散文通也疏及敖氏皆謂更取房中之爵非

右主人致爵于主婦自酢

三獻作止爵

註曰賓也謂三獻者以事命之作起也舊說云賓入戶北面曰皇尸請舉爵

敖氏曰致爵之禮成亦足以少塞尸之止爵意矣於此而作止爵亦宜也若俟畢獻乃為之則久留尊者之爵非所以為敬

尸卒爵酢

張氏曰賓作爵尸酢賓其酢當亦祝酌尸拜送

世佐案尸卒爵亦祝受爵命賓拜送乃酢也尸酢
賓如其酢主人與主婦之禮經不言者蒙下如初
之文也郝云賓受爵遂自酢非

酌獻祝及佐食

楊氏曰案上文賓三獻尸止爵不舉故未得獻祝與
佐食待主人主婦致爵與醕神惠已均賓乃作止爵
尸卒爵酢賓賓遂獻祝及佐食事之序也

敖氏曰賓獻祝亦北面拜於戶西獻佐食亦西面拜

於主人之南也

洗爵酌致于主人主婦燔從皆如初更爵酢于主人卒
復位

註曰洗乃致爵為異事新之燔從皆如初者如亞獻
及主人主婦致爵也凡獻佐食皆無從其薦俎獻兄
弟以齒設之賓更爵自酢亦不承婦人爵

疏曰燔從如初則無肝從皆者謂主人主婦嫌獻佐
食亦然故云凡獻佐食皆無從下記云佐食於旅也

齒於兄弟故薦俎亦與兄弟同時設之

從楊氏圖節本

楊氏曰上文主人主婦獻皆至祝佐食而止今賓獻祝佐食畢又致爵于主人主婦故洗爵酌致為異事新之也

敖氏曰賓既獻佐食則室中之事畢矣乃復致爵者因上禮也皆皆尸卒爵以下也自尸卒爵以至及佐食如主人酢獻之禮也致于主人者如主婦致爵之禮也致于主婦者如主人致爵之禮也燔從者如亞

獻祝及致于主人主婦之禮也言此則是其從獻之物僅有此耳亦見其殺于初者也致于主人主婦乃唯酢于主人者為禮主於尊者也賓更爵自酢其義與主人之自酢者同更爵不言降與升酌又不言如初亦文省

郝氏曰復位復堂下東面之位

世佐案燔從謂獻祝及致爵于主人主婦也祝之從獻無邊主人主婦之從獻無肝皆異于初者故

特見之教于皆如初三字分析最為詳明註疏連
燔從為義偏矣賓自酢訖亦以爵奠于篚乃復位

右賓作止爵終三獻之禮

主人降阼階西面拜賓如初洗賓辭洗

註曰拜賓而洗爵為將獻之如初視濯時主人再拜
賓答拜三拜衆賓衆賓答再拜者

教氏曰階下當有前字少牢下篇曰主人洗爵長賓

辭主人奠爵于篚興對

張氏曰此下獻賓獻衆賓設尊酬賓獻長兄弟獻衆兄弟獻內兄弟凡六節以三獻尸訖事神禮成順神意以達惠六節共為一科其設尊兩階先以酬賓又所以為旅酬發端也

世佐案賓之辭洗也自堂下東行辭之與鄉飲酒之衆賓相似

卒洗揖讓升酌西階上獻賓賓北面拜受爵主人在右
答拜

註曰就賓拜者此禮不主于尊也賓卑則不專階主人在右統於其位

疏曰案鄉飲酒鄉射賓主獻酢各於其階至酬乃同

階此因祭如初

如初二字恐誤當作而獻

賓非為尊之所尊者謂

尸也又賓是士家有司卑不得專階故就之北面以東為右主人位在阼階故云統於其位

敖氏曰獻賓蓋西南面也

郝氏曰禮主祭則賓不專階主賓皆北面

世佐案是禮主于祭不主于賓至獻賓而禮已殺
矣故賓主同階註云賓卑非

薦脯醢設折俎

註曰凡節解者皆曰折俎不言其體略言折俎非貴
體也上賓骼衆賓儀公有司設之

疏曰有司徹註儀者尊體盡儀度餘骨可用而用之
教氏曰自賓以下其設薦俎者皆以私人為之與
賓左執爵祭豆奠爵興取肺坐絕祭嚌之興加于俎坐

拱手祭酒卒爵拜主人答拜受爵酌酬奠爵拜賓答拜
註曰主人酌自酢者賓不敢敵主人主人達其意
敖氏曰豆亦兼籩言也

世佐案賓不酢主人辟尸禮也祭祀之時已得獻
而親酢獻已者惟尸耳其他皆不敢因之所以尊尸
也註誤賓是主人之僚友非不敵也

主人坐祭卒爵拜賓答拜揖執祭降西面奠于其位
如初薦俎從設

註曰位如初復其位東面少牢饋食禮宰夫執薦以從設于祭東司士執俎以從設于薦東是則皆公有司為之與

疏曰賓位在西階下東面今受獻於西階上經云執祭以降西面奠于其位又言位如初明復西階下東面位也

敖氏曰執祭脯也云位如初嫌既獻則位或異也

郝氏曰酢畢賓揖主人自執所祭肺下堂西面奠于

其位仍東面立如初其西階上所薦豆俎皆從設于位

世佐案祭謂脯及肺之置于地者必執以降敬也且示某將復位于下然而主人之羣吏遂執其薦俎以從之也必復位于下者辟後之受獻者也

右主人獻賓自酢

衆賓升拜受爵坐祭立飲薦俎設于其位辨主人備答拜焉降實爵于篚

註曰衆賓立飲賤不備禮鄉飲酒記曰立卒爵者不拜既爵備盡盡人之答拜

敖氏曰辯謂皆有薦俎也其薦俎亦於每獻一人則設之備答拜謂悉答之也其拜亦在每人受爵之後世佐案其位在西階下賓南薦俎不先設於西階上而即設于其位亦殺于賓也降實爵于篚亦謂主人也然則衆賓每一人飲訖輒以爵授主人矣不言者文不具也鄉飲酒禮云坐祭立飲不拜既

爵授主人爵降復位又案註畫人之答拜之字當
在答拜之下

右主人獻衆賓

尊兩壺于阼階東加勺南枋西方亦如之

註曰為酬賓及兄弟行神惠不酌上尊卑異之就其
位尊之兩壺皆酒優之先尊東方示惠由近禮進曰
澄酒在下

敖氏曰設尊於堂下者欲其便且別於大夫禮也兩

壺皆酒者別於上尊也

郝氏曰將行旅酬不敢用堂上戶東神尊而別尊于堂下也兩壺皆酒人衆也

主人洗觶酌于西方之尊西階前北面酬賓賓在左

註曰先酌西方者尊賓之義

敖氏曰於此酬賓終正禮也酬賓於西方故酌西方之尊酬於下者宜近賓位使其奠之

世佐案禮成于酬故以是終獻賓之禮且為旅酬

發端也酌于下者明此尊為酬酒設賓在左如其在階上之位也

主人奠觶拜賓答拜主人坐祭卒觶拜賓答拜

敖氏曰此賓主之拜亦皆北面

主人洗解賓辭主人對

敖氏曰少牢下篇云主人奠爵于篚對

卒洗酌西面賓北面拜

註曰西面者鄉賓位立於西階之前賓所答拜之東

北

主人奠解于薦北

註曰奠酬于薦左非為其不舉行神惠不可同於飲酒

疏曰神惠右不舉生人飲酒左不舉今行神惠不可同于飲酒故奠于左與生人相變

教氏曰不授而奠酬之正禮薦北薦左也既奠則復位北面拜文不具耳此奠解于庭皆將舉者也而或

在薦左或在薦右蓋各從其便而不取奠者於左將舉於右之義也

姜氏曰薦北下當有答拜二字蓋闕文

賓坐取觶還東面拜主人答拜賓奠觶于薦南揖復位
註曰還東面就其位薦西奠觶薦南明將舉

疏曰云揖復位則初奠時少南於位可知云還東面則初賓坐取觶薦東西面可知故鄭註云還東面就其位薦西也

教氏曰賓坐取觶而興象受之也賓取觶亦西而還面東面拜謝主人之奠觶也執奠觶而拜所以見其意東面而奠于薦南亦便也復位主人復阼階下西面位也奠而不辭既則以拜謝之皆變於飲酒之儀也

郝氏曰揖揖主人復位復東向之初位

世佐案賓拜時亦奠觶經不言者畧可知也教云執奠觶而拜非揖復位當以䟽及郝說為正教云

主人復阼階下西面位亦非

右主人酬賓

主人洗爵獻長兄弟于阼階上如賓儀

註曰酬賓乃獻長兄弟者獻之禮成于酬先成賓禮
此主人之義亦有薦胾設于位私人為之與

疏曰長兄弟初受獻于阼階上時亦薦脯醢設折俎
於阼階上祭訖乃執以降設於下位皆當如賓儀

教氏曰此獻于阼階上異内外也獻亦西南面如賓

儀兼酢言也

郝氏曰獻于阼階上者酌堂上之尊獻禮重于酬也
張氏曰註疏皆不言酬既云如賓儀當亦主人自酢
也

右主人獻長兄弟自酢

洗獻衆兄弟如衆賓儀

註曰獻卑而必為之洗者顯神惠此言如衆賓儀則
如獻衆賓洗明矣

楊氏曰如西階獻衆賓儀坐祭立飲薦俎設于其位
辯又曰主人獻祝及佐食之時惟祝言設俎不言設
佐食俎者案三獻作止爵鄭註云凡獻佐食皆無從
其薦俎獻兄弟以齒設之疏引記云佐食於旅齒於
兄弟故佐食薦俎亦與獻兄弟同時設此主人於初
獻佐食之時不言設俎至此獻兄弟時乃設之也
敖氏曰獻衆兄弟與獻長兄弟之禮相屬乃為之洗
者以其承已自酢之後故須洗之也然則獻衆賓於

自酢之後則亦宜為之洗矣上經不言者文略耳

右主人獻衆兄弟

洗獻內兄弟于房中如獻衆兄弟之儀

註曰內兄弟內賓宗婦也如衆兄弟如其拜受坐祭立飲設薦俎于其位而立內賓位在房中之尊北不殊其長略婦人也有司徹曰主人洗獻內賓於房中南面拜受爵

疏曰云其位在房中之尊北者案下記云尊兩壺于

房中西墉下南上內賓立于其北東面南上宗婦北
堂東面北上是也引有司徹者欲見此內賓受獻時
亦南面拜受爵

敖氏曰獻之蓋西北面


主人西面答拜更爵酢卒爵降實爵于篚入復位

註曰爵辨乃自酢以初不殊其長也內賓之長亦南
面答拜

敖氏曰更爵亦在房中者也

世佐案更爵亦於下篚必更之者男女不相襲也
入復位入室復戶內西面位

右主人獻內兄弟自酢



儀禮集編卷三十五